



NATIONAAL
ARCHEOLOGISCH
ANTROPOLOGISCH
MUSEUM

HUNTU NOS TA FORMA MUSEO NASHONAL

Konmemorashon di komèrsio di katibu i resistensia (2001)

Dia 23 di ougùstùs ta fecha ku Unesco a proklamá 'International Day for the Remembrance of the Slave Trade and its Abolition', esta 'Dia Internashonal pa Konmemorá Komèrsio di Katibu i Abolishon di Sklabitut'. A skohe e fecha akí pasobra den e anochi di 22 pa 23 di ougùstùs 1791 un rebelion enorme a estayá den e kolonia franses Saint Domingue, loke despues a bin yama Haiti. Tabata un rebelion krusial, pasobra esaki tabata e promé impulso pa yega na abolishon total di komèrsio di katibu i sklabitut.

Den e tantísimo publikashonnan tokante sklabitut, historiadornan ta distinguí dos diferente sorto di rebelion di katibu, es desir esunnan promé i esunnan despues di e revolushon akí. Promé ku 1791 katibunan tabata lanta prinsipalmente pasobra nan tabata malkontentu ku nan sirkunstansianan di bida i nan tabata ke por ehèmpel mihó alimento i paña pa bisti. E forman akí di resistensia, hopi biaha individual, tabata konosí tambe komo '*petite marronage*', 'marronahe chikitu', di e palabra 'maroon' o 'cimarron' ku ta nifiká katibu ku a hui. Despues di 1791 e resistensia tabata fundá mas bien riba prinsipionan di e revolushon franses libertat i igualdat.

E rebelion na Saint Domingue tabata bien pronto konosí den nos region i viktoria di e katibunan franses a hasi un impreshon enorme tambe riba e katibunan na e otro partinan di region Karibe.

Pa mes motibu tambe den e periodo ei na 'Curaçao en onderhorigheden' a surgi agitashon den e komunidad di katibu. E agitashon akí a oumentá ora Fransiya a konkista Hulanda na prinsipio di 1795. Den su kolonianan Fransiya a duna e katibunan libertat ofisialmente i e katibunan na St. Maarten, St. Eustatius i Kòrsou a pensa ku e ora ei nan tambe lo mester a bira hende liber. E rumornan ku ta konsientemente outoridat kolonial a tene e libertat akí atras, a fortifiká e agitashon. E katibunan franses no a gosa muchu tempu di 'liberté' i 'égalité'. Napoleon a bolbe instituí sklabitut na 1802, pasobra parse ku su kasá Josephine tabatin interesnan di gran importansia den plantashinan di suku na Martinique.

Notisia di e gran rebelion di katibu dia 10 di mei 1795 na Coro (Venezuela), dirigí pa Juan José de la Caridad, un katibu ku a hui for di Kòrsou i ku tabata papia tres lenga, tambe a yega Kòrsou i esaki a lanta e resistensia na vlandam.

Dia 17 di ougùstùs 1795 e gran rebelion di katibu a kuminsá na Kòrsou na plantashi Kenepa. Mas o ménos sinkuenta katibu bou di direkshon di Tula a nenga di bai traha. Nan a bandoná e plantashi i nan a reuní ku e katibunan di Santa Cruz, bou di mando di Bastiaan Karpata. Katibunan di otro plantashinan a uni ku e rebeldenan. Dia 18 di ougùstùs e katibunan a bai Portomarí, kaminda nan tabata pa bai establese kuartel general di e rebeldenan. Dia 19 di ougùstùs na e saliñanan di Portomarí tabatin un konfrontashon ku ehérsito, mandá pa suprimí e rebelion. Katibunan a gana e bataya. Durante e históriko kombersashon di mediashon entre pader Jacobus Schinck i Tula, e lider di rebeldenan a splika bon kla ku ta pa libertat e katibunan tabata lucha. Dia 20 di ougùstùs tabatin un atake riba Portomarí. Un kantidat di katibu a muri i a kohe 12 di nan prezu. Sobrá a hui bai Fontein. Katibunan di Hato i Seru Grandi tambe a djòin e rebeldenan, ku entretantu a krese te na un dos mil katibu. Dia 25 di ougùstùs a sigui un lucha fuerte na Fontein i finalmente katibunan a pèrdè e bataya

sangriento. Tabatin masha morto i herido. A kibra e rebelion, hopi katibu a entregá i e lidernan a hui bai den besindario di Seru Kristóf. Ta bon kla ku ta nan kompañeronan di mes suerte a traishoná Tula, Karpata i Mercier.

Na e plenchi dilanti di palasio di gobernador na kant'i awa, dia 3 di òktober a hustisiá lidernan di e rebelion. Tula nan a habraká bibu, nan a kima su kara i kap su kabes kita afó. A tira su kurpa na awa i a kologá su kabes pa tur hende mira riba Rif na e lugá ku tabata kologá hende na palu di horka. Despues ku a oblig'é di para mira ehekushon di Tula, a toka Karpata e mes suerte. Mercier tambe nan a mata di un forma horibel. En total 26 katibu a haña pena di morto. Lider di e rebeldenan Tula, tabatin komo beinam Rigaud, nòmber ku el a tuma di e general mulato Benoit Joseph Rigaud, un di e héroenan di e revolushon na Saint Domingue.

Na 1985 gobièrnu di Kòrsou a proklamá 17 di ougùstùs dia di lucha pa libertat. For di añanan sesenta tur aña e konmemorashon ta tuma lugá na Rif. Konmemorashon di e resistensia di katibu i emansipashon ta tuma lugá na St. Eustatius i St. Maarten dia 1^e di yùli, manera semper selebrá komo 'Freedom day'.

Fuentenan:

Breaking the Silence, edishon di Unesco

1795 de slavenopstand op Curaçao, un edishon di fuente di Centraal Historisch Archief bou di dirkeshon di dr. A.F. Paula, (1974)

Julia G. Crane, *Statia Silhouettes* (1999)

Lasana M. Sekou (ed.) *National Symbols of St. Martin* (1997)

Ch. do Rego, *Sklabitud i Rebelion 1795* (1995)



Foto:
Monumento Nashonal 'Desenkadená' di e eskultor Nel Simon na Rif

KADER:

Teksto: Corine Havinga. Portrèt: Prince Victor. E seri 'Huntu nos ta forma Museo Nashonal' ta sali den Amigoe, Extra i The Daily Herald. Reakshon i sugerensianan pa kontribushon pa e publikashonnan ta sinseramente bon biní. Por alkansá Museo Nashonal di Arkeologia i Antropologia (NAAM) na Belvederestraat 43-45, telefòn (09) 462.1933, fax (09) 462.1936 e-mail: naamna@onenet.an